



**G**ERAKAN Islam liberal ialah segelintir golongan yang mengaku Islam tetapi mengikut situasi semasa dan mentafsirkan Islam mengikut cita rasa sendiri.

Pensyarah Kanan di Jabatan Syariah, Fakulti Pengajian Islam Universiti Kebangsaan Malaysia (UKM), Datuk Dr Mohd Izhar Aniff Mohd Kashim berkata, aliran Islam liberal ini semakin menular di Malaysia ekoran mendapat sambutan orang kenamaan dan berpengaruh.

"Sokongan golongan ini membuatkan aliran Islam liberal diterima dan mendapat sambutan meluas di negara kita.

"Misalnya kedatangan tokoh liberal kontroversi, Amina Wadud yang memperkenalkan ajaran perempuan boleh melaungkan azan dan menjadi imam bagi solat jemaah, telah menggalakkan perkembangan Islam liberal di Malaysia dan juga ke peringkat antarabangsa," katanya.

Mohd Izhar mencadangkan media terutamanya akhbar, laman sosial seperti Facebook dan Twitter menjadi medium utama menyebarkan isu halal dan haram serta isu keagamaan, bukannya melebihi berita berunsur hiburan semata-mata.

"Ini tidak, jika isu melibatkan Islam dan keagamaan ditempatkan di muka surat belakang 30 atau 69, tak dapat muka depan.

"Media sepatutnya peka dengan golongan sasaran iaitu anak muda yang minat dengan pendekatan

# LIBERAL TAFSIR ISLAM IKUT SITUASI

Islam liberal yang dianggap mudah dan tidak membebankan. Jika media kekal 'menyimpan' isu halal haram di muka surat belakang sampai bila-bila pun perkara ini tidak di ambil peduli," katanya kepada *Sinar Harian*.

Tambah beliau, kenyataan-kenyataan yang dikeluarkan oleh kelompok-kelompok pengamal aliran liberal di media-media sosial tidak pula dikenakan siasatan atau sebarang tindakan menjadikan 'virus' ini merebak dengan mudah tanpa sebarang sekatan.

"Selain mendapat sokongan terutamanya golongan muda, kenyataan ulama-ulama liberal ini juga tidak pula di ambil tindakan.

"Mereka dimasyhurkan menerusi medium-medium tertentu terutamanya di laman Facebook, Twitter dan juga aplikasi WhatsApp," katanya.

Beliau menasihatkan agar media mengubah gaya penyiaran supaya meletakkan Islam di muka depan.

"Buat anak-anak muda jangan mudah terpedaya dengan Islam liberal yang membuat tafsiran al-Quran mengikut akal, mengubah undang-undang Islam sehingga memesongkan akidah Islam," katanya.

**"Sokongan daripada golongan berpengaruh membuatkan aliran Islam liberal diterima dan mendapat sambutan meluas di negara kita."**

